

Siunnersuummut oqaaseqaatit

Oqaaseqaatit nalinginnaasut

1. Inatsisissatut siunnersuutip tunngavia

Siunnersuut nammineerluni nalunaarsuiffiit amerlanerujartuinnartut piaaraluniugunartoq kingusi-naartumik nassiunneqartalernerannik pissuteqarpoq. Nammineerluni nalunaarsuiffiit kingusinaartumik nassiunneqartut Akileraaruseriffimmi piffissarujussuarmik atueqqiffiusarput, tassami aningaasarsiat akileraaruteqaataasussat nammineerluni nalunaarsuiffimmik nassiussiffissap qaangiunnerani missingersuinikkut angissusilerneqarsimasut nammineerluni nalunaarsuiffiup kingusinaartumik nassiunneqarnerata kingunerisaanik suliareqqinneqartussaammata, inaarutaasumillu naatsorsuineq aammaarlugu nutaamik nassiunneqartussaalluni.

Aningaasarsianit akileraarutissat, nammineerluni nalunaarsuiffiup ingerlatsinermullu naatsorsuutit ulloq ataaseq sinnerlugu ullulli qulit inorlugit qimmuilluni nassiunneqarneranni maannakkut 2 procentimik, piffissaagallartillugulu nassiussinissamut piffissaliussaq ullunik qulinik amerlanerusunilluunniit qimmorneqartillugu 5 procentimik qaffanneqartarput. Qaffaat pisuni tamani minnerpaamik 100 kr.-iussaaq annerpaamillu 2.000. kr.-iulluni.

Aaqqissuussineq maannakkut atuuttoq nammineerluni nalunaarsuisussaatitaasut nammineerluni nalunaarsuiffiup nassiunnissaanut piffissaliussamik eqquutsitsinissaannut pilerinarsaatitaqanngilaq, tassami nammineerluni nalunaarsuisussaatitaasut aningaasarsianik akileraaruteqaataasussanik minusimik inernilinnik aningaasarsiaqartut nammineerluni nalunaarsuiffimmik nassiussinissamut piffissaliussamik qimmuisut akilertagaat tassatuaavoq qaffaat 100 kr.-iuseq erniaalu. Erniat inatsisit naapertorlugit inuttut isigineqarsinnaasunut tunngatillugu 6 kr.-iupput inunnullu 8 kr.-iullutik.

Aammattaaq siunnersuutaavoq paasissutissanik paarlaateqatigiissinnaaneq annertusillugu nunat sumiiffiillu allat Kalaallit Nunaata isumaqatigiissuteqarfigisai ilanngunneqassasut. Annertusisitsinissaq nunarsuarmi qanilliarturnerup, aammalu Kalaallit Nunaanni inuit selskabillu il.il. pillugit paasissutissat akileraartarnermi soqutiginaatillit amerliartuinnartut nunani allani aningaaserivinni pigineqarnerisa kinguneraat.

Taamaammat Naalakkersuisut pilersaarutigaat, aningaasarsianit akileraarutit pillugit inatsimmi § 114, imm. 2, nr. 2 tunngavigalugu, nuna tamat akileraarusiisarneranni tatiginassuseqarneq pitsanggorsarniarlugu aammalu nunani allani kontut akileraarusiiffigineqartarneri pillugit tatiginassuseq pillugu inatsiseqalernissaq siunertaralugu USA isumaqatigiissuteqarfiginissaa. Aamma paasissutissanik akileraartarnermi soqutiginaatilinnik nunarsuarmi tamarmi ingerlaannartumik paarlaateqatigiittarnerup atugaanerulernissaanik siuarsaaniarnerit, pingaartumik OECD-p sulissutigisai Kalaallit Nunaata tapersorsorpai.

USA-mik isumaqatigiissuteqarnissamut kissaateqarnermut tunngaviuvoq inatsit Amerikami Kongresip 2010-mi martsimi aalajangiussaa. Inatsisip taassuma kinguneraa nunat allat aningaaseriviisa tamarmik, sullitamik amerikarmiut kontui toqqortaallu pillugit paasissutissanik assigiinngitsunik Amerikami akileraartarnermut oqartussaasunut ukiut tamaasa tunniussisarnissaat. Aningaaseriviit tamanna malinngikkunikku akiliutit Amerikaminngaanniit aallaavillit tigusamik 30 pct.-iinik akileraartinneqaratarsinnaapput. Inatsisip amerikarmiutut taaguutigaa "Foreign Account Tax Compliance Act" (naalisarlugu "FATCA").

Amerikami akileraarusiisarnermi maleruagassat eqquutsinneqarnissaannik qulakkeerinnissaq, amerikarmiullu akileraartussaataasut aningaasanik nunani allani aningaaserivinnut inissiinerisigut akileraanngitsoorniarsinnaanerup pinaveersimatinniarnissaa FATCA-p siunertarai.

2. Inatsisissatut siunnersuutip imarisaa

2.1 Nammineerluni nalunaarsuiffimmik nassiussinissamut piffissaliussaq.

Siunnersuutip kingunerissavaa nammineerluni nalunaarsuiffimmik nassiussinissamut piffissaliussamik eqquutsinissaq pilerinarsarniarlugu sukaterineq.

Procentiliilluni maannakkut qaffaasarneq allanngortillugu, nammineerluni nalunaarsuiffimmik nassiussinissamut piffissaliussap ullormik ataatsimik qimmorneqarneri tamaasa akileraarutissanut qaffaassutissap aalajangersimap 200 kr.-iunissaa, taamaattorli inunnut annerpaamik 2.000 kr.-iunissaa, aammalu namminersorlutik inuussutissarsiutinik ingerlataqartunut aamma inatsisit naapertorlugit inuttut isigineqarsinnaasunut annerpaamik 5.000 kr.-iunissaa siunnersuutaavoq.

Nammineerluni nalunaarsuiffik, nammineerluni nalunaarsuiffimmik nassiussinissamut piffissaliussap qaangiutinnginnerani tiguneqarsimannginnera akileraartarnermut oqartussaasunit paasineqarpat akileraarutissanut qaffaassutissaq atuutilissaaq. Akileraarutissat qaffaassutissaannik, taamatullu aamma nammineerluni nalunaarsuinissamut piffissaliussamik qimmuinermik naatsorsuineq inatsimmi § 16, imm. 3-miit 4-mut tunngavigalugit pissaaq.

Akileraarutissat qaffaassutissaat inaarutaasumik naatsorsuinerumut ilanngunneqassaaq, akileraarutillu allat assigalugit pineqassalluni, tassa piffissaq akilernerqarfissaa, ernialersuineq, akiligassiisutigineqarnera akilersinniarneqarnissaalu eqqarsaatigalugit.

Nammineerluni nalunaarsuiffiup nassiunneqarnerata kingorna paasinarsippat nammineerluni nalunaarsuiffik piumasaqaataasunut naleqqiulluni ima amigaateqartigisoq, tak. § 17 aamma § 18, allaat nammineerluni nalunaarsuiffik nammineerluni nalunaarsuiffittut il.il. pissusissamisoortutut isigineqarsinnaanani, taava akileraarutissat qaffaassutissaat piffissamut pineqartumut tunngatillugu tamakkiisumik akiligassiisutigineqassapput. Pisuni taamaattuni qaffaassutissamik tamakkiisumik ilaannakuusumilluunniit akiliisinneqannginnissaaq immikkut ittumik qinnutigineqarsinnaavoq, jf. § 19, imm. 2.

2014-imut nammineerluni nalunaarsuiffiit 2015-imi nassiunneqartussat siunnersuummi pineqartunut ilaassapput.

Akileraarutissat qaffaassutissaasa pillaammik akiliisitsissutit assiginnigilaat.

2.2 FACTA

Kalaallit Nunaata USA-llu akornanni isumaqatigiissutip kingunerissavaa, nunatsinni aningaaseriviit kontut USA-mut attuumassuteqartut kikkunnit pigineqarnerisa paasineqarsinnaanissaat siunertaralugu periutsit erseqqinnerusumik nassuiarneqartut ingerlattassagaat, kontullu pineqartut akileraararnermut oqartussaasunut ukiumoortumik nalunaarutigisassallugit. Taava akileraararnermut oqartussaasut peqquneqaqqaanngikkaluarlutik paasissutissat nalunaarutigineqartut tamarmiusut Amerikami akileraararnermut oqartussaasunut ingerlateqqittassavaat. Kalaallit Nunaata USA-mi uningasuutigineqartut pillugit paasissutissanik imaaliallaannaq pissarsisalernissaa isumaqatigiissutip kingunerinaviannigilaa. Isumaqatigiissulli Amerikami oqartussaasut isumaqatigiinniarfiginerisigut annertusineqarsinnaassaaq, USA-miillu paasissutissanik pissarsisalernissaaq ilanngullugu.

Kalaallit Nunaata isumaqatigiissut malillugu pisussaaffiusinnaasaminik naammassinnissinnaanissaa anguniarlugu nunatsinni inatsisip pisariaqartutigut allanngortinneqarnissaa siunnersuutikkut uguuna pissaq. Tassa allannguutissatut siunnersuutigineqartut siullertut siunertaraat, nunatsinni aningaaseriviit nalunaarutaasa Amerikami akileraararnermut oqartussaasunut ingerlateqqinneqartussat akileraararnermut oqartussaasunit pissarsiarineqarnissaat qulakkeerniarlugu Naalakkersuisut nalunaaruteqartarnej pillugu maleruagassanik aalajangersaasinnaanissaannik periarfissiinissaaq. Allannguutissatut siunnersuutit aappaattut siunertaraat aningaaseriviit kontut nalunaarutigineqartussaasut kikkunnit pigineqarnerinik paasinninnissamut periusissanik ingerlatsisarnissaat pillugu Naalakkersuisut piumasaqaateqarsinnaanissaannik periarfissiinissaaq. Siunnersuummi siunertat pingajoraat nunatsinni aningaaseriviit pisussaaffimminnik isumaqatigiissummi aalajangersarneqartunik naammassinnissinnaanissaannik periarfissiinissaaq. Siunnersuummi siunertat sisamattut periarfissiisutiginarneqarput, pisussaaffinnik pineqartunik eqquutsitsinngitsoqartillugu eqquutsitsinissap pingitsaaliissutigineqarsinnaanissaa eqquutsitsinnginnermullu pillaatissiisarnissaaq.

FATCA-p siunniussaaraa nunani allani aningaaseriviit paasissutissanik pineqartunik Amerikami akileraaruserisunut, Internal Revenue Service-imut (IRS) toqqaannartumik nalunaaruteqartarnissaat, aammalu nunani allani aningaaseriviit taamaaliortarnissaat qulakkeerniarlugu pilerinarsaatinik imaqarpoq. Maleruagassat aningaaserivinnut Amerikameersuunngitsunut nunarsuarmi tamarmeersunut assigiipput.

Kalaallit Nunaata USA-llu isumaqatigiissutaat nunatsinni aningaaseriviit, nunatsinni maleruagassat atuuttut malillugit akileraararnermut oqartussaasunut nalunaaruteqartussaataareernerannik aallaaveqassaaq.

Aamma nunatsinni aningaaseriviit sullitamik nalunaarutigineqartussat akuersiseqqaarnagit, immikkut inatsisiliorneraqanngitsumik IRS-imut nalunaaruteqarsinnaannginnerat isumaqatigiissummut aallaaviusaaq.

Nalunaaruteqartussaataaernerit nutaat aamma kontut nalunaarutigineqartussaasut kikkunnit pigineqarnerisa paasineqarsinnaanissaannut periutsinik ingerlatsisussaanerit aalajangersakkatigut, Naalackersuisut erseqqinnerusumik aalajangersagaliuussinnaasaattut piginnaatitsinikkut ilusilerneqartussatigut pinissaat siunnersuutigineqarpoq. Tamatuma saniatigut ilimagineqarsinnaavoq paasissutissanik taamaattunik paarlaateqatigiittarnissaq anguniarlugu Kalaallit Nunaat suleqatinut allanut aammattaaq isumaqatigiissuteqarumaartoq. Kalaallit Nunaata USA-llu isumaqatigiissutaata kisimi pinnani, aammali isumaqatigiissutit taamaattut Kalaallit Nunaata suleqatillu allat isumaqatigiissutigiuunagaasa eqquutsinneqarnissaat periusissatut siunnersuutigineqartup qulakkiisavaa.

Nunatsinni aningaaseriviit, aningaaserivinni kontut Amerikamut attuumassuteqartut pillugit nalunaaruteqartussaataaernerit pillugit aalajangersakkanik nutaanik imartunerusunillu atuutilersitsinissaq ilutigalugu aammattaaq naleqquttuusorineqarpoq, aningaaseriviit sullitamik tamaasa pillugit paasissutissanik taamaattunik, matumani aamma kontut inunnit inatsisillu naapertorlugit inuttut isigineqarsinnaasunit nunanut allanut USA-junngitsumut attuumassuteqartunit, matumanissaaq aamma inunnit Kalaallit Nunaannuinaq akileraartussaataasunit pigineqartut pillugit paasissutis-sisarnissamik peqquneqarnissaat periarfissiuunneqassasoq.

Taamaaliornikkut anguneqartussaq siulleq tassaavoq Kalaallit Nunaata suleqatinut allanut, USA-junngitsumut, paasissutissanik taamaattunik paarlaateqatigiittarnissamik isumaqatigiissuteqarsinnaalernerit. Anguneqartussat aappaat tassaavoq akileraartarnermut oqartussaasut nunatsinni aningaaseriviit sullitaat nunatsinneersut pillugit paasissutissat, nunatsinni aningaaseriviit sullitaat nunanit allaneersut pillugit paasissutissat, akileraartarnermut oqartussaasut nunat sumiiffiillu allat akileraartarnermut oqartussaasuinut ingerlateqqitassamissut pissarsiassamik, aammalu akileraartarnermut oqartussaasut nunani sumiiffinniilu allani aningaaseriviit sullitaat nunatsinneersut pillugit paasissutissat pissarsiassamik assingi pissarsiarisinnaalissamatigut.

Tassa nalunaaruteqartussaaneermik aalajangersagaq nutaaq nalinginnaasuutinneqassaaq, nalunaaruteqartussaataaneq aningaaseriviit sullitaminnut tunngatillugu pisussaaffigissallugu, akileraartussaataasut nunamut sumiiffimmulluunniit sumut, matumani aamma Kalaallit Nunaannut attuumassuteqarnerat apeqqutaatinnagu, aammalu nunamut sumiiffimmulluunniit sumut attuumassuteqarneq taanna aalajangerneqarsinnaanngikkaluarpuunniit. Tassungali ilutigatillugu siunnersuutaavoq aalajangersagaq ima ilusilerneqassasoq, Naalackersuisut nalunaaruteqartussaaneq pillugu maleruagassanik pineqartunik atuutilersitsinissamut piginnaatinneqassallutik, aammalu maleruagassat ilusilerneqarneranni immikkoortinneqarsinnaassasoq kontoqartut allalluunniit nalunaarutigineqartussat nunamut/sumiiffimmut sumut imaluunniit nunanut/sumiiffinnut sunut attuumassuteqarnerisut. Tassuunakkut soorlu nalunaaruteqartussaaneerit atuutsikkiartuaarneqarsinnaapput.

Taamatutaaq aaqqiinikkut Naalackersuisut periarfissinneqassapput maleruagassanik assigiinngiiaartunik, nuna sumiiffilluunniit nalunaaruteqarnissami pineqartoq suunersoq, imaluunniit attuumassuteqarnerup aalajangerneqarsinnaannginnera apeqqutaatillugit aalajangersaanissamut. Tasunga atatillugu imaanngilaq akileraartarnermut oqartussaasut, nunani sumiiffinniluunniit tamarluinnarni akileraartarnermut oqartussaasunut paarlaateqateqarfissaannut nalunaarutigineqartussat pillugit maleruagassat assigiinngitsut aalajangersarneqarnissaat siunniunneqartoq. Paarlattuanik, maleruagassat sapinngisamik assigiissuunissaat paasissutissanik paarlaateqatigiittarnissap ingerlaannartumik pisarnissaanik nunat tamat akornanni anguniagaasunut ilaavoq. Taamaakkaluartoq FATCA-mik isumaqatigiissummi maleruagassaqaassaaq (matumani ilanngullugit aningaaseriviit peqataanngitsut pillugit nalunaaruteqarnissamik aamma Amerikami innuttaassuseqartut akileraartarnikkut USA-mut attuumassuteqanngitsut pillugit nalunaaruteqarnissamik maleruagassat) USA-p FATCA-mik ingerlatsinissaanut atussallugit ima immikkuullaritsigipput, allaat Kalaallit Nunaata suleqatinut allanut isumaqatigiissutigiumaagaani ilaaqqinnissaat ilimagineqarsinnaanani. Aammami FATCA-mik isumaqatigiissut aningaaseriviit, aningaaserivinni kontut Amerikamut attuumassuteqarsinnaanerannik pasitsaassinerni qaqugukkut misissuisarnissaannut killissarititanik aalajangersimasunik imaqarpoq.

Naalackersuisut nalunaaruteqartussaananerik nutaanik atuutilersitsinissamut, maleruagassat nutaat malillugit periarfissinneqarput. Aalajangersagaq siunnersuutigineqartoq ima ilusiligaavoq, paasissutissanik FATCA-mik isumaqatigiissummi pineqartunik tamarluinnarnik nalunaaruteqarnissap Naalackersuisunit maleruagassiuunneqarsinnaanera periarfissiissutigineqarluni. Paasissutissat taakku ilaat maannakkut nalunaarutigineqartareerput, paasissutissallu taakku marloriarluni nalunaarutigineqartarnissaat siunertaanngilaq. Siunertaasoq tassaavoq paasissutissat nalunaarutigineqartussat, nalunaaruteqartarneq pillugu maleruagassani erseqqinnerusumik aalajangersarneqartussani aningaaseriviit nalunaaruteqartussaananeranut pioreersunut ilanngunneqartussaallutik.

2.3. Inatsit atuuttoq

Nr. 1

Aningaasarsianit akileraarutissat, nammineerluni nalunaarsuiffiup ingerlatsinermullu naatsorsuutit ulloq ataaseq sinnerlugu ullulli qulit inorlugit qimmuilluni nassiunneqarneranni maannakkut 2 procentimik, piffissaagallartillugulu nassiussinissamut piffissaliussaq ullunik qulinik amerlanerusuniluunniit qimmorneqartillugu 5 procentimik qaffanneqartarput. Qaffaat pisuni tamani minnerpaamik 100 kr.-iussaaq annerpaamillu 2.000. kr.-iulluni.

Nr. 2

Aningaaseriviit, sparekarsit, piginneqatigiinnikkut karsit, aningaasaliisarnernik ingerlatsiviit, pisor-tat karsii, qularnaveequsiilluni aningaasanik atorniartarfiit, pappiaqqanut nalilinnut centralit, ani-

ngaasaliissuteqartarnermut peqatigiiffiit, aningaasanik nalilinnik nioqquteqartut allallu aktianik, anpartinik, obligationinik, tammarnaveqqusiinermut allagartanik, aningaasaliissuteqarnermut uppernarsaatinik, naafferartumik akilersukkanut allagartanik pappiaqqanilluunniit nalilinnik allanik paaq-qutassatut isumagisassaminnik tiguisartut imaluunniit pappiaqqanik nalilinnik taamaattunik nioqquteqarnikkut kaaviiartitsisut kaaviiartitsinermiluunniit akunnermiliuttuusut qinnuigineqaqqaan-gikkaluarlutik, uninngasuutit pillugit paasissutissanik akileraaruseriffimmut ukiut tamaasa tunnius-sisarnissaat pillugu maleruagassat, akileraaruserinermik ingerlatsineq pillugu inatsimmi § 35-mi maleruagassat atuuttut naapertorlugit aalajangersarneqarsinnaapput.

Piginnaatitsinermik aalajangersagaq Namminersorlutik Oqartussat nalunaarutaanni nr. 8, 18. juni 2010-meersumi, §§-ini 10-miit 20-mut atorneqarpoq.

Aamma akileraaruserinermik ingerlatsineq pillugu inatsimmi § 65-imi allaqqavog aningaaseriviit, sparekassit, andelskassit, aningaasanik nioqqutillit, vekselinik nioqqutillit, eqqartuussissuserisut allallu aningaasanik nakkutigisassaqtartut tigusaqtartulluunniit inuussutissarsitugalugu aningaasanik taarsigassarsisitsisartut piumaffigineqarnermikkut inuit inatsisillu malillugit inuttut isigineqarsinnaasut aqqisigut taaneqartut pillugit paasissutissat aalajangersimasut akileraaruseriffimmut tunniut-tassavaat.

2.4. Inatsisartut inatsisissaattut siunnersuut

Nr. 1

Nammineerluni nalunaarsuiffiup kingusinaarluni nassiuunneqarnerani procentiliilluni qaffaasarneq allangortillugu, nammineerluni nalunaarsuiffimmik nassiussinissamut piffissaliussap ullormik ataatsimik qimmorneqarneri tamaasa qaffaassutissap aalajangersimap 200 kr.-iunissaa, taamaattorli inunnut annerpaamik 2.000 kr.-iunissaa, aammalu namminersorlutik inuussutissarsiuutinik ingerlataqartunut aamma inatsisit naapertorlugit inuttut isigineqarsinnaasunut annerpaamik 5.000 kr.-iunissaa siunnersuutaavoq.

Nr. 2

Nunatsinni maleruagassat atuuttut, Kalaallit Nunaata FATCA-mik isumaqatigiissut naapertorlugu pisussaaffimminik tamanik naammassinnissinnaanissaanut naammangillat. Taamaattumik siunnersuutip siunertaraa Kalaallit Nunaata pisussaaffinnik taakkuninnga naammassinnissinnaanissaanik qulakkeerinissaq. Maleruagassalli siunnersuutigineqartut atuunnissaat kontunut USA-mut attuumasuteqartunuinnaq killiligaanngilaq.

Paasissutissat, nalunaaruteqarnissaq pillugu maleruagassiuunneqarsinnaasutut siunnersuutigineqartut tassaapput:

- Kinaanermut paasissutissat, soorlu ateq, najugaq, cpr-, cvr- imaluunniit IIN-normu aamma kinaanermut paasissutissatut nunani allani normut pigineqarpata taakku, kiisalu kontoqartup

kinaaneraniik paasissutissat allat aammalu – kontoqartoq tassaappat inatsisit malillugit inutut isigineqartoq, inummik ataatsimik arlaqartunilluunniit nakkutilliisoqartoq – inuit nakkutilliisuusut pillugit paasissutissat taamaattut. Aamma tassaasinnaapput pineqartut nunamut/sumiiffimmumut sumut imaluunniit nunanut/sumiiffinnut sunut attuumassuteqarnerat pillugu paasissutissat.

- Inuit nakkutilliisuusut tassaapput inuit ingerlatsivimmik nakkutilliisuusut. Pigisanik nakkutilliisuunernut tunngatillugu tassaapput pilersitsisoq, ingerlatsisut, (immaqa) illersuisoq, iluaqutissinneqartut imaluunniit iluaqutissinneqartut aalajangersimasut aamma inuk kinaluunniit nakkutigisassaritinneqartumik nakkutiginnilluinnartoq, aammalu taaguut inuit tassaavoq nakkutilliisuunani inatsisit naapertorlugit allatut aaqqissuussinermut tunngatillugu taamatut assingusumilluunniit atorfeqartut.
- Kinaanermut paasissutissat allat pineqarneranni pingaartumik pineqarpoq ulloq inunngorfik. Aamma taamatut oqaasertaliinermi ilanngunneqarsinnaapput kinaanermut paasissutissat allat, kontoqartut inuillu nakkutilliisuusut pillugit paasissutissat allat taamaattut tunniunneqartarnissaat Kalaallit Nunaata suleqatinik allanik, USA-junngitsumik isumaqatigiissutigiuunnaani allassimappat.
- Kontup normua imaluunniit aningaaserivimmi kontu pillugu paasissutissat assingusut.
- Aningaaseriviup nalunaaruteqartup aqqa kinaaneraniillu paasissutissatut normu, matumani aamma kinaaneraniik paasissutissatut normut nunat allat oqartussaasuinit atuutilersinneqartut.

Nunanut sumiiffinnullu sunut attuumassuteqarnerup suunera pillugu nalunaaruteqartoqassappat, tamanna maleruagassani aalajangersagaq naapertorlugu atuutilersinneqartuni erseqqissarneqarsinnaavoq. Nalunaarutitut akileraartarnermut oqartussaasut USA-mut ingerlateqqitassaannut tunngatillugu, atorneqartussaag tassaavoq nalunaaruteqartussaasup kinaaneraniik paasissutissatut normu USA-mit atuutilersinneqartoq. Tassunga pissutaavoq USA-p, aningaaseriviit FATCA-mik paasissutissanik nalunaaruteqartartut, taakku suleqatigisap inatsisitigut oqartussaaffiani inissisimanagerat inissisimanninneralluunniit apeqqutaatinnagu, nunarsuaq tamakkerlugu nalunaarsorneqarfiannik piorsaanerani. Aningaaserivinnut pineqartunut akiliinermi, akileraarutiniik Amerikami FATCA-mik maleruagassat naapertorlugit unerartitsisoqannginnissaa tassuunakkut qulakkeerneqarsinnaavoq. Taamaammatt nalunaaruteqartussaasup kinaaneraniik paasissutissatut Amerikami normup nalunaarutigineqarnissaa pillugu maleruagassat maleruagassanut erseqqinnerusunut, aalajangersagaq naapertorlugu atuutilersinneqartussanut ilanngunneqartussaassapput.

Kontunut imaaliillaannaq tiguneqarsinnaanngitsunik imaqartunut tunngatillugu aamma siunnersuutaavoq kontumi pigisat pilersitaannik erniat, iluanaarutisiat aamma aningaasarsiat allat tamarmiusut aningaasartaasa nalunaarutigineqarnissaat maleruagassiunneqarsinnaasoq. Aningaasat pineqartut tassaapput aningaasat qaammatisiutit malillugit ukiup ingerlanerani kontumut imaluunniit kontu pillugu akilernerqarsimasut ilanngunneqarsimasulluunniit.

Aammattaaq siunnersuut malillugu aalajangersarneqarsinnaapput tunisinikkut imaluunniit nalilinnik aningaasannortitsinikkut iluanaarutit tamarmiusut, qaammatisiutit malillugit ukiup ingerlanerani kontumut akilerneqarsimasut ilanngunneqarsimasulluunniit nalunaarutigineqarnissaat pillugu male-ruagassat. Tamannali taamaallaat atuuppoq tunisinernut aningaasannortitsinernulluunniit, nalunaa-riteqartussaasup kontoqartoq sinnerlugu isumagisimasaanut.

Aallaqqaatit akiliutinut kontunut sunulluunniit tunngatillugu erniat tamarmiusut aningaasartaasa, qaammatisiutit malillugit ukiup ingerlanerani kontumut akilerneqarsimasut ilanngunneqarsimasul-lluunniit nalunaarutigineqarnissaat pillugu maleruagassiortoqarsinnaavoq.

Aningaaserivimmi kontunut, imaaliallaannaq tiguneqarsinnaanngitsutut kontuunatik imaluunniit aallaqqaasiutit kontuunngitsunut tunngatillugu aningaasat tamarmiusut, aningaaseriviup nalunaa-riteqartuusup qaammatisiutit malillugit ukiup akiliiffigisassaata pisassannortitsiffissaataluunniit ingerlanerani kontu pillugu kontoqartumut akilerneqarsimasut pisassannortinneqarsimasulluunniit nalunaarutigineqarnissaat pillugu maleruagassiortoqarsinnaavoq. Tassanili taamaallaat pineqarput aningaasat, aningaaseriviup nalunaaruteqartuusup akilertussaasai pisassannortitassaaluunniit. Ma-tumani ilanngullugu pineqarpoq aningaasat aningaasannortitsinikkut pissarsiarineqarsimajunnartut tamarmiusut, kontoqartumut qaammatisiutit malillugit ukiup ingerlanerani akilerneqarsimanerannik nalunaaruteqarnissaq pillugu maleruagassiortoqarsinnaammat.

Siunnersuutaavortaaq aningaaseriviit, aningaaseriviit akiliiffigisimasamik erseqqinnerusumik taane-qartut aqqinik, taakkununngalu tamanut akiliutit taamaattut tamarmiusut aningaasartaannik aam-mattaaq nalunaarutiginninnissaat Naalakkersuisunit maleruagassiuunneqarsinnaassasoq.

FATCA-mik isumaqatigiisummik atuutilersitsinissaq siunertaralugu, maleruagassap siunnersuuti-gineqartup kingunerisaanik, aningaaseriviit isumaqatigiisut taanna malillugu peqataanngitsutut isi-gineqartut aqqinik taakkununngalu akiliutinik tamarmiusunik nalunaaruteqarnissaq pillugu maleru-a-gassiortoqartariaqassaaq.

Maleruagassanut erseqqinnerusunut, FATCA-mik isumaqatigiisummik atuutilersitsinissaq siuner-taralugu aalajangersarneqartussanut tunngatillugu taaguut akiliutit FATCA-mik isumaqatigiisum-mi atornerqartoq erseqqissarneqartariaqassaaq. Taaguummi tassani pineqarput iliuuseqanngikkalu-arluni aningaasarsiat ukiumoortumik piffissamulluunniit aalajangersimasumut angissusilerneqarluti-luunniit naatsorsorneqartartut. Taakku tassaapput erniat, iluanaarutisiat aamma iliuuseqanngikkalu-arluni aningaasarsiat taakkununnga assingusut.

Aningaasat FATCA-mik isumaqatigiisut malillugu nalunaarutigineqartussat tassaapput 2015-imi 2016-imilu aningaasat tamarmiusut, unerartitsisussaataasup aningaaserivimmut peqataanngitsumut pineqartumut akilersimasai.

Aningaaseriviit nalunaaruteqartussaataasut, aningaaserivinni kontut aamma aningaaserivinnut er-seqqinnerusumik taaneqartunut akiliutit pillugit nalunaaruteqarnerminni peqqissaartumik periuse-

qarnissaat pillugu maleruagassanik Naalakkersuisut atuutilersitsisinnaanissaat siunnersuutigineqarpoq. Aammattaaq siunnersuutaavoq nammineq nalunaajaateqartarnissaq pillugu maleruagassat Naalakkersuisut aalajangersarsinnaassagaat.

Nammineq nalunaajaatinut tunngatillugu, kontunik pilersitsinermut atatillugu nammineq nalunaajaateqartarnissaq pillugu maleruagassat, aamma aningaaserivimmi kontup nunamut sumiiffimmulluunniit attuumassuteqarneranik pasitsaassisimaneq pissutigalugu kontu pillugu paasissutissanik paarlaateqateqartusaanermik ilumuunnginneraalluni nammineq nalunaajaateqartarnissaq pillugu maleruagassat aalajangersarneqarsinnaassapput. Attuumassuteqarneq naalagaaffimmullu innuttaasuseqarneq pillugu paasissutissanut tunngatillugu isumaavoq, maleruagassat erseqqinnerusut ilusilersorneqarneranni paasissutissat pineqartut tassaassasut nuna nunalluunniit imaluunniit sumiiffik sumiiffiilluunniit pineqartup akileraartarnikkut angerlarsimaffianut tunngasut, aammalu kontoqartup USA-mut innuttaasuseqarneranut tunngasut. Aammattaaq isumaavoq kontunik nutaanik ammaasoqarnerani nammineq nalunaajaateqartoqartassasoq, nunanut allanut attuumassuteqartoqarneranik attuumassuteqartoqannginneranilluunniit pasitsaassisoqarnera apeqqutaatinnagu, aamma Kalaallit Nunaat aningaaserivinni kontut pillugit paasissutissanik nunamut sumiiffimmulluunniit pineqartumut ingerlaannartumik tunniussisussaagaluarpalluunniit. Nammineq nalunaajaatit taamaalillutik FATCA-mik isumaqatigiissutaannarmut atatillugu atorsinnaassanngillat, aammali Kalaallit Nunaata suleqatinut allanut isumaqatigiissutigiunnagaanut atatillugu, kiisalu aningaaserivinni kontut pillugit nalunaaruteqartussaataitanermut nalinginnaasumut atatillugu atorneqarsinnaassallutik.

Taamatuttaaq isumaavoq aningaaseriviit, nammineq nalunaajaatit qanoq iluseqarnissaat oqaasertalersorneqarnissaallu kiisalu qanoq pissarsiariniarneqarnissaannut periaasissaq eqqarsaatigalugit namminersorsinnaalluartinneqassasut. Imali ilusilersugaassapput kontoqartup nuna nunalluunniit imaluunniit sumiiffik sumiiffiilluunniit pineqartup akileraartarnikkut angerlarsimaffigisani, aammalu pineqartup USA-mut innuttaasuseqarnini (akuersaarnermigut naaggaarnermigulluunniit), kiisalu paasissutissat allat nammineq nalunaajatinut ilaajunnartut nalunaarsinnaassallugit. Paasissutissat allat tassaasinnaapput Kalaallit Nunaata nunanut sumiiffinnulluunniit allanut USA-junngitsumut isumaqatigiissutigiunnagaani paasissutissat takuneqarsinnaasut.

Aningaaseriviit aningaaserivinnut allanut akiliuteqarnerminni nunanut allanut akileraarutiniq unerartitsisinnaanissaat siunnersuutaavoq. Taamaaliortoqarsinnaassappat unerartitsinissamik pisussaneq Kalaallit Nunaata nunallu sumiiffiilluunniit pineqartup akornanni isumaqatigiissummi ilanngunneqarsimassaaq.

Aalajangersagaq nunatsinni aningaaserivinnut, USA-p tungaanut akunnermiliuttuunissamut piukkullutik (qualified intermediaries) sassarsimasunut, tassungalugu unerartitsisussaajumasunut tunngatillugu pisariaqarpoq. Akileraarutit unerartinneqartut, akileraartarnermut oqartussaasut akilutitinnikkaluarlugit IRS-imut akilerneqartassapput. Taamatut unerartitsinissamut nunatsinni inatsisitigut periarfissaqanngippat, unerartitsinissaq aningaaseriviup aningaasanik tigusisussap akuerseqqarneratigut pisariaqartassaaq. Akuerseqqaartarnissaq taamaattoq ileqqussaannartut isigineqassan-

ngilaq. Taamaattoqaraluarpammi nunatsinni aningaaserivik Amerikap FATCA-mik inatsisaanik malinnittutut isigineqarunnaarsinnaavoq. Taamaalillunimi aamma akiliutinik Amerikaminngaanniit aallaavilinnik nunatsinni aningaaserivimmu akiliinermi 30 pct.-inik unerartitsisoqartussaassaaq. Taamatut pisoqarnissaa pinngitsoorniarlugu, aningaaserivik peqataangitsoq akuersiseqqaarnagu unerartitsisinaanerup inatsitigut periarfissiuunneqarnissaa siunnersuutaavoq.

Aalajangersakkatut siunnersuut nalinginnaasumik ilusiligaavoq, tassa Kalaallit Nunaata nunanut sumiiffinnullu allanut taamatulli isumaqatigiissutigiuunagaani aamma atorsinnaangorlugu, taakku nunanut allanut akileraarutinik unerartitsinissaq pillugu maleruagassanik taamaattunik imaqarpata.

Aamma siunnersuutaavoq aningaaseriviit, aningaaserivinnut allanut aningaasanik nunanut allanut akileraaruteqaataasussanik akiliuteqartartut imaluunniit taamatut akiliuteqarnermi akunnermiliutuusut, akiliuteqarnissaq sioqqullugu suliaqartussanut paasissutissanik ingerlatitseqqittarnissaat pillugu maleruagassanik Naalakkersuisut aalajangersaasinnaanissaat. Paasissutissat ingerlateqqinnersinnaasussat tassatuaassapput paasissutissat taamatut akiliuteqarnissami unerartitsinissamut nalunaaruteqarnissamullu pisariaqartut.

Maleruagassaq siunnersuutaasoq nalinginnaasumik ilusiligaavoq, tassa Kalaallit Nunaata nunanut sumiiffinnulluunniit allanut taamatulli isumaqatigiissutigiuunagaani aamma atorsinnaangorlugu, taakku akiliuteqarnissaq sioqqullugu suliaqartussanut paasissutissanik nalunaaruteqartarnissaq pillugu maleruagassanik taamaattunik imaqarpata.

Aningaaserivimmi kontumik pilersitsisup kontoqartut inuillu nakkutilliisuujunnartut cpr-, cvr- imaluunniit IIN-normuinik aamma kinaanermut paasissutissatut nunani allani normut pigineqarpata normunik taakkuninnga nalunaarutiginninnissamik pisussaaffilerneqarnissaa siunnersuutigineqarpoq. Aamma siunnersuutaavoq kontumik taamaattumik pilersitsisup kontoqartut inuillu nakkutilliisuujunnartut kinaanerinik paasissutissat allat tunniutissagai.

Maleruagassaq taanna (siunnersuullumi tamarmi) siunnersuummi § 2 naapertorlugu 1. januar 2015-imi atuutilersussaassaaq, tak. ataani. Kontunut ulloq taanna nallertinnagu pilersinneqartunut tunngatillugu siunnersuutaavoq Naalakkersuisut, aningaaseriviit kinaanermut paasissutissanik pineqartunik pissarsiniartarnissaannik kontoqartullu tunniussisarnissaannik pisussaaffiliinissamut piginnaatinneqassasut. Maleruagassap siunnersuutigineqartup FATCA-mik isumaqatigiissummi allaaserisaq 6, imm. 4, litra b-mik eqquutsitsinissaq qulakkiissavaa, taannami malillugu Kalaallit Nunaat imminut pisussaatiippoq 1. januar 2017 aallarnerfigalugu maleruagassiorsimassalluni, nunatsinni aningaaseriviit nalunaaruteqartussaaitat, selskabit inuillu Amerikameersut nalunaarutigineqartussat Amerikami akileraartartutut normuinik pissarsiniartarnissaannik pisussaaffiliisunik, tassa 2017-imut ukiunullu kingusinnerusunut tunngatillugu nalunaaruteqartarnissaq siunertaralugu.

Kinguneqartitsisarnermut tunngatillugu siunnersuutaavoq pisussaaffinnik, aalajangersakkat siunnersuutigineqartut naapertorlugit aningaaserivinnut pisussaaffiliunneqarsinnaasunik naammassinninnginnermi pinngitsaaliinikkut akiliisitsisinaanermut aamma pillaammik akiliisitsisinaanermut pe-

riarfissanik atuutilersitsisoqassasoq. Tassa imaappoq nalunaaruteqartussaaneq pillugu maleruagassanut aamma peqqissaartumik periuseqarnissaq pillugu maleruagassanut tunngatillugu kinguneqartitsisinaanermut periarfissanik, akileraaruserinermik ingerlatsineq pillugu inatsit naapertorlugu nalunaaruteqartussaataitanermut atatillugu atuutereersut assinginik atuutilersitsinissaq siunnersuutikkut anguniarneqarpoq.

Siunnersuut inatsimmut atuuttumut naleqqiullugu	
<i>Oqaasertai atuuttut</i>	<i>Siunnersuut</i>
	§ 1 Akileraaruserinermik ingerlatsineq pillugu Inatsisartut inatsisaanni nr. 11, 2. november 2006-imeersumi makku allannguutigittinneqassapput:
§ 19. <i>Imm. 1.</i> Nammineerluni nalunaarsuut pissusissamisoortoq piffissaagallartillugu nassiuneqarsimanngippat, piffissaagallartilluguli nassiussivissaq ullut 10-t inorlugit qimmorneqarsimappat, aningaasarsianit akileraarutissat 2 procentimik qaffanneqassapput. Piffissarli ullormik ataasiinnarmik qimmorneqarsimappat qaffaasoqassanngilaq. Piffissaa-gallartillugu nassiussivissaq ullunik 10-nik amerlanerusunilluunniit qimmorneqarsimappat aningaasarsianit akileraarutissat 5 procentimik qaffanneqassapput. Qaffaatissarli minnerpaamik 100 kr.-iussaaq annerpaamillu 2.000 kr.-iusinnaalluni. <i>Imm. 2.</i> Immikkut pissutissaqartillugu akileraaruseriffiup qaffaammik imm. 1-imi taaneqartumik tamakkiisumik ilaannakortumilluunniit qaffaasoqannginnissaa nalunaarutigisinnaavaa.	1. § 19, imm. 1-2, ima oqaasertaqassaaq: ” <i>Imm. 1.</i> Nammineerluni nalunaarsuisussaa-titaasup nammineerluni nalunaarsuut pissusissamisoortoq piffissaagallartillugu nassiussimanngippagu, akileraarutissat nammineerluni nalunaarsuummik nassiussinissamut piffissaliussap ullormik ataatsimik qimmorneqarneri tamaasa 200 kr.-inik qaffanneqassapput, taamaattorli inunnut tunngatillugu katillugit annerpaamik 2.000 kr.-inik, aammalu namminersorlutik inuussutissarsiutinik ingerlataqartunut kiisalu inatsisit naapertorlugit inuttut isigineqarsinnaasunut tunngatillugu katillugit annerpaamik 5.000 kr.-inik.” <i>Imm. 2.</i> Immikkut pissutissaqartillugu akileraaruseriffiup qaffaammik imm. 1-imi taaneqartumik tamakkiisumik ilaannakortumilluunniit qaffaasoqannginnissaa nalunaarutigisinnaavaa.
	2. § 35-p kingornanut ilanngunneqassaaq:

	<p>§ 35 a. Aningaaseriviit qinnuigineqaqqaanngikkaluarlutik, kontut pillugit paasissutissanik makkuninnga imaqartunik akileraaruseriffimmut ukiumoortumik nalunaaruteqartarnissaat Naalakkersuisut maleruagassiuussinnaavaat:</p> <p>1) Ateq, najugaq, cpr-, cvr- imaluunniit IIN-normu aamma kinaanermut paasissutissat nunani allani normut kiisalu kontoqartut kinaanerannik paasissutissat allat, aammalu taakku nunanut sumiiffinnulluunniit sunut attuumassuteqarnerannik paasissutissat. Kontoqartunut inatsisit malillugit inuttut isigineqartunut, inummik ataatsimik inunnilluunniit arlaqartunik nakkutilliisoqartunut tunngatilugu aamma pineqartut tassaasinnaapput inuit nakkutilliisuusut kikkulluunniit pillugit paasissutissat taamaattut.</p> <p>2) Kontup normua, kontulluunniit normua pigineqanngippat taassuma taamaaqataa alla siunertanut atussallugu naleqquttoq.</p> <p>3) Aningaaseriviup nalunaaruteqartup aqqa kinaaneranullu paasissutissatut normut, matumani aamma kinaanermut paasissutissatut normut nunat allat oqartussaasuinit atulersineqarsimasut.</p> <p>4) Aningaaserivimmi kontup imarisai nalingaluunniit, matumani aamma, sillimmasiinnermik isumaqatigiissut aningaasanngorlugu nalilik imaluunniit taarsigassarsiat assigiiartumik taarsersorneqarnissaannik isumaqatigiissut pineqartillugu, qaammatsiutit malillugit ukiup pineqartup naanerani imaluunniit kontu qaammatsiutit malillugit ukioq naatinagu matusimappat matunnginnerani aningaasanngorlugu nalinga utertinneqarnerataluunniit nalinga.</p>
--	---

	<p>5) Kontunut imaaliillaannaq tiguneqarsinnaanngitsunik imaqartunut tunngatillugu:</p> <p>a) Kontumi pigisat pilersitaannik erniat tamarmiusut aningaasartaat, iluanaarutisiat tamarmiusut aningaasartaat aamma aningaasarsiat allat tamarmiusut aningaasartaat, aningaasat qaammatisiutit malillugit ukiup ingerlanerani kontumut akilerneqarsimappata ilanngunneqarsimappataluunniit imaluunniit kontu pillugu akilerneqarsimappata ilanngunneqarsimappataluunniit.</p> <p>b) Tunisinikkut imaluunniit nalilinnik aningaasanngortitsinikkut iluanaarutit tamarmiusut, qaammatisiutit malillugit ukiup ingerlanerani kontumut akilerneqarsimasut ilanngunneqarsimasulluunniit, aningaaserivik nalunaaruteqartuusooq tunisinermi aningaasanngortitsinermiluunniit kontoqartumut sinniisuusimappat.</p> <p>6) Aallaqqaatitut akiliutinut kontunut sunulluunniit tunngatillugu erniat tamarmiusut aningaasartaat, qaammatisiutit malillugit ukiup ingerlanerani kontumut akilerneqarsimasut ilanngunneqarsimasulluunniit.</p> <p>7) Kontunut sunulluunniit nr. 5-imi 6-imi luunniit pineqartunut ilaanngitsunut tunngatillugu aningaasat tamarmiusut, aningaaseriviup nalunaaruteqartuusup qaammatisiutit malillugit ukiup akiliiffigisassaata pisassanngortitsiffissaataluunniit ingerlanerani, kontoqartumut kontu pillugu akilerneqarsimasut pisassanngortinneqarsimasulluunniit, matumani ilanngullugit aningaasat aningaasanngortitsinikkut pissarsiarineqarsimajunnartut kontoqartumut qaammatisiutit malillugit ukiup ingerlanerani akilerneqarsimasut.</p> <p><i>Imm. 2. Aningaaseriviit aningaaseriviit aki-</i></p>
--	--

	<p>liiffigisimasamik erseqqinnerusumik taaneqartut aqqinik, taakkunungalu tamanut akiliutit taamaattut tamarmiusut aningaasartaanik aammattaaq nalunaaruteqartarnissaat Naalakkersuisut maleruagassiuussinnaavaat.</p> <p><i>Imm. 3.</i> Aningaaseriviit nalunaaruteqartussaaitaasut uppersaanerminni aningaaserivinnilu kontut kikkunnit pigineqarneri aammalu aningaaserivinnut erseqqinnerusumik taaneqartunut akiliutit pillugit nalunaaruteqarnerminni peqqissaartumik periuseqarnissaat Naalakkersuisut maleruagassiuussinnaavaat, tak. imm. 2. Periusissanut taakkununga atatillugu aammattaaq nammineq nalunaajaateqartarnissaq Naalakkersuisut maleruagassiuussinnaavaat.</p> <p><i>Imm. 4.</i> Maleruagassat imm. 1-imiit 3-mut naapertorlugit atulersinneqarsimasut taamaallaat kontoqartunut aamma inatsisit naapertorlugit inuttut isigineqarsinnaasunut inunnik nakkutilliisoqartunut aammalu nunanut sumiiffinnulluunniit, marloriaammik akileraannginnissaq pillugu isumaqatigiissut, nunat tammat isumaqatigiissutaat alla naalagaaffiilluunniit isumaqatigiissutaat imaluunniit allafeqarfitsigoortumik isumaqatigiissut naapertorlugi akileraarutigut suliassani ikioqatigiittarnissamik isumaqatigiissuteqarfigineqarsimasunut, aningaaserivinni kontut pillugit paasissutissanik imm. 1-imi 2-milu taaneqartunik ingerlaannartumik paarlaasseqatissanut attuumassuteqartunut, imaluunniit attuumassuteqarneq aalajangerneqarsinnaanngitsillugu atuuttuunissaat Naalakkersuisut aalajangersinnaavaat. Aammattaaq maleruagassat imm. 1-imi 2-milu taaneqartunit piumasaaqatitakinnerusut Naalakkersuisut aalajangersarsinnaavaat, maleruagassallu assi-</p>
--	--

	<p>giinngitsunik imaqartinneqarsinnaapput, kontoqartut imaluunniit inuit nakkutilliisuusut nunanut sumiiffinnulluunniit sunut attuumasuteqarnerat, aamma attuumasuteqarnerup aalajangerneqarsinnaannginnera apeqqutaatillugit. Nalunaaruteqartussaataitanerup atuutsikkiartuaarneqarnissaa aamma Naalakkersuisut maleruagassiuussinnaavaat.</p> <p><i>Imm. 5.</i> Aningaaseriviit aningaaserivinnut allanut akiliinerminni, pisussaaffiit Namminersorlutik Oqartussat aamma nunap sumiiffiulluunniit pineqartup isumaqatigiissutaanni ilaatinneqartut eqquutsinniarlugit, nunanut allanut akileraarutit unerartissinnaavaat. Aningaaseriviit nunanut allanut akileraaruteqaa-taasussanik aningaaserivinnut allanut akiliisut akunnermiliuttuusulluunniit paasissutissanik, akiliuteqarnissaq sioqqullugu suliaqartussamut, akiliuteqarnermi taamaattumi unerartitsinissamut tamatumingalu nalunaaruteqarnissamut pisarialinnik ingerlatitseqqitarnissaat Naalakkersuisut maleruagassiuussinnaavaat.</p> <p><i>Imm. 6.</i> Aningaaserivimmi kontumik pilersitsisup kontoqartut inuillu nakkutilliisuujunnartut cpr-, cvr- imaluunniit IIN-normui aamma kinaanermut paasissutissatut nunani allani normut pigineqarpata normut taakku aningaaserivimmut, maleruagassat erseqqinnerusut Naalakkersuisunit aalajangersarneqartut naapertorlugit nalunaarutigissavai kiisalu paasissutissat allat, kontoqartut inuillu nakkutilliisuujunnartut kinaanerinik paasissutissatut pisariallit tunniutissallugit. Kontut kingusinnerpaamik 31. december 2013-imi pilersinneqartut pillugit paasissutissanik imm. 1-imi taaneqartunik aningaaseriviit pissarsiniarnissamut, kontoqartullu aningaaserivin-</p>
--	---

	<p>nut nalunaaruteqarnissamut pisussaaffii Naalakkersuisut maleruagassiuussinnaavaat.</p> <p><i>Imm. 7.</i> Nunanut tamanut isumaqatigiissuteqarnissanut piginnaatitsissut uani ikkunneqassaaq</p>
	<p style="text-align: center;">§ 2</p> <p>Inatsisartut inatsisaanni § 1, nr. 1 atuutilissaaq 1. januar 2015-imi.</p> <p><i>Imm. 2.</i> 2014-imut nammineerluni nalunaarsuutit 2015-imi nassiunneqartussat Inatsisartut inatsisaanni pineqartunut ilaassapput.</p> <p><i>Imm. 3.</i> Inatsisartut inatsisaanni § 1, nr. 2 atuutilissaaq 1. juli 2014-imi.</p>

3. Pisortanut aningaasatigut allaffissornikkullu sunniutissai

Nammineerluni nalunaarsuiffimmik nassiussinissamut piffissaliussaq pillugu inatsimmi allannguutit kingunerisaannik nammineerluni nalunaarsuiffimmik nassiussinissamut piffissaliussanik eqquutsisinerulernikkut allaffissorneq eqqarsaatigalugu piffissamik sipaarnermik nassataqassapput, tassami allaffissornermi suliassat marloriarlugit sularisariaqakkat maannakkornit ikinnerussangatinneqarmata.

FATCA-mik isumaqatigiissummik atuutilersitsisinnaaneq eqqarsaatigalugu tamanna pisortat aningaasartuuteqarnerulernerannik kinguneqassangatinneqanngilaq, paasissutissammi FATCA-mik isumaqatigiissummi pineqartut arlaqartut akileraartarnermut oqartussaasunut maanna nalunaarutigineqartareerput, taamaammallu allaffissornermi aaqquissuussineq nalunaarutininik suliaqarnissamut piareersagaareerpoq. Siunnersuut allaffissornermut aningaasartuutaanerulissagaluarpat taakku ikituararsuussapput, aningaasatigullu atugassarititaasut iluanni akilerneqarsinnaassallutik.

4. Inuussutissarsiutinik ingerlataqartunut aningaasatigut allaffissornikkullu sunniutissai

Nammineerluni nalunaarsuiffimmik kingusinaarluni nassiussinermi akileraarutissanut qaffaassutissat amerlissapput, tamannalu nammineerluni nalunaarsuiffinnik nassiussinissamut piffissaliussanik eqquutsitsinnginnermi inuussutissarsiutinik ingerlataqartunut aningaasartuuteqarnerulernermik ki-

nguneqassaaq. Siunnersuutip nammineerluni nalunaarsuiffimmik nassiussinissamut piffissaliussanik eqquutsitsinissaq eqqarsaatigalugu pinaveersaartitsinermik kinguneqarnissaa naatsorsuutigineqarpoq, taamaammallu siunnersuutip aningaasatigut sunniutissaasa qanoq amerlatiginissaat qularnaatsumik nalilerneqarsinnaangilaq.

Allaffissorneq eqqarsaatigalugu inuussutissarsiutinik ingerlataqartunut taasarialinnik sunniuteqarnissaa naatsorsuutigineqanngilaq.

FATCA-mik isumaqatigiisummut malinnaanissamik siunnersuut inuussutissarsiutinik ingerlataqartunut aningaasatigut sunniuteqassanganneqanngilaq.

FATCA-milli isumaqatigiisummut malinnaanissamik siunnersuut nunatsinni aningaaseriviit allaffissornerannut nammakkiinerulissaaq. Tassa imaappoq aningaaseriviit pisussaaffimminnik isumaginninnissaminni peqqissaartumik pinissaat nammakkersuutaanerulersussaaq. Aammattaaq nalunaaruteqarnissamut imminermut tunngatillugu nammakkersuutaanerulaalissaaq. Nammakkersuutaanerulersussalli amerlanngitsuinnarnik aningaasartuutaanerulernissaat naatsorsuutigineqarpoq.

5. Avatangiisinut, pinngortitamut inuillu peqqissusiannut sunniutissai

Siunnersuut avatangiisinut pinngortitamulluunniit sunniuteqassanganneqanngilaq.

Siunnersuut inuit peqqissusiannut sunniuteqassanganneqanngilaq.

6. Innuttaasunut sunniutissai

Nammineerluni nalunaarsuiffimmik kingusinaarluni nassiussinermi akileraarutissanut qaffaassutisat amerlissapput, tamannalu nammineerluni nalunaarsuiffinnik nassiussinissamut piffissaliussanik eqquutsitsinnginnermi innuttaasunut aningaasartuuteqarnerulernermik kinguneqassaaq. Siunnersuutip nammineerluni nalunaarsuiffimmik nassiussinissamut piffissaliussanik eqquutsitsinissaq eqqarsaatigalugu pinaveersaartitsinermik kinguneqarnissaa naatsorsuutigineqarpoq, taamaammallu siunnersuutip aningaasatigut sunniutissaasa qanoq amerlatiginissaat qularnaatsumik nalilerneqarsinnaangilaq.

Akileraarutit pillugit paasissutissanik nunallu tamat paarlaateqatigiinnerulernissamik siunnersuut innuttaasunut sunniuteqassanganneqanngilaq.

7. Sunniutissai pingaarutillit allat

Siunnersuut allanik pingaarutilinnik sunniuteqassanganneqanngilaq.

8. Oqartussaasunik kattuffinnillu il.il. tusarniaaneq

Siunnersuut piffissami 12. december 2013-imiit 6. januar 2014-imut ukununnga tusarniaassutigineqarpoq:

KANUKOKA, Kalaallit Nunaanni Sulisitsisut Peqatigiiffiat (GA), Nunaqavissut Suliffiutillit Kattuffiat (NUSUKA), Sulinermik Inuussutissarsiuteqartut Kattuffiat (SIK), KPMG Grønland, Deloitte, Grønlands Revisionskontor, Inuussutissarsiornermut, Aatsitassaqaqarnermut Suliffeqaqarnermullu Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Ineqarnermut, Pinngortitamut Avatangiisinullu Naalakkersuisoqarfik, Grønlandsbanken, BankNordik, SISA aamma PFA Soraarneq.

Inatsisissatut siunnersuut oqaaseqaatitaalu Tusarniaavimmi saqqummiunneqarnikuunngillat.

Naalakkersuisut har løbende været i dialog med bankerne i forbindelse med udarbejdelsen af forslaget.

Tusarniaanermut atatillugu immikkut pisoqarneranut pequtaavoq siunnersuutaasup teknikkikkut immikkut ittuunerata nutserniarnera immikkut ajornarsisimammagu taamaattumillu piffissamik atuffiunerusariaqarsimalluni. Aammattaaq siunnersuutip immikkut teknikkikkut tunngaveqarnera pingaarnertut kalaallit nunaanni aningaaserivinnut soqutiginaateqarpoq. Siunnersuutip suliarineqarneranut atatillugu Naalakkersuisut suliap ingerlanerani aningaaseriviit ingerlaavartumik attavigarsimavaat.

Tusarniaanermi akissuteqarnissamut piffissaliussap qaangiunnerani GrønlandsBANKEN, Grønlands Arbejdsgiverforeningen (GA) kiisalu KANUKOKA akissuteqarput.

Tusarniaanermi akissutini immikkoortunut pingaarnernut tulliullugit taaneqartunut tusarniaanermi akissutit tiguneqartut oqaaseqaatinik kinguneqartitsipput (Naalakkersuisut oqaaseqaataat uingasunik naqinnilinnik allanneqarput):

Grønlands Arbejdsgiverforening (GA)

GA-p tusarniaanermut akissummini isumaqatigaa, piffissatut killiussat malinneqartassasut, aamma lu nammineerluni nalunaarsuiffiit kingusinaarluni tunniunneqartunut akileraarutissanut qaffaammik naatsorsuisoqartassasoq.

GA-lli inassutigaa, nammineerluni nalunaarsuummik tunniussinissamut piffissaliusseq ukiumoortumillu nalunaarusiamik nassiussinissamut killiliusseq pingaartillugit naleqqussartariaqartut. GA-p tamanna oqaaseqarfigaa, ukiumoortumik naalunaarusiap maannamut piffissaliusseq naapertorlugu namminneerluni nalunaarsuutip tunniunnissaanut piffissaliusseq sanilliullugu qaammammik ataatsimik sapaatillu akunnerinik pingasunik sivisunerummat. Tamanna GA-p naapertuilluannigitsut isigaa, tassami eqqortumik nammineerluni nalunaarsuusiornissamut piumasaqaataammat, naatsorsuutit kukkunerisiorneqarsimanissaat aammalu suliffeqarfiup aqutsisuunit piginnittuinillu akueri-

ne-qarsimanissaat. Maannamut ingerlatseriaatsip kingunerisarpaa, ingerlatsiviit naatsorsuutaasa 1. maj tikitsinnagu suliarineqarsimanissaat akuerineqarsimanissaallu, tamanna GA-p isumaa malillugit ingerlatsiviit unammilligassinneqartarpoq.

Taamaattumik GA-p inassutigaa, sulinermik inuussutissarsiortunut 1. maj, suliffeqarfinnut ataatsimik piginnittulinnut 1. juni aammalu ingerlatsivinnut 1. juli nammineerluni nalunaarsuutiniq tunniussinissamut killiliunneqassasut. GA-p isumaa malillugu assigiinngitsunik piffissaliinerup Akileraartarnermut Aqatsisoqarfimmut suliassiisutaasut siammarneqassapput tamatumunngalu ilutigalugu kukkunerisuiusut ingerlatseqatigiiffiillu akileraartarnermut nalunaarusiornissaminnut ukiumoor-tumillu nalunaarusiornissaminnut pitsaanerusumik periarfissinneqassapput.

Naalakkersuisut nammineerluni nalunaarsuinissamut aammalu aningaasarsianik angissusiliisarnermut piffissaliussat allanngortinneqarsinnaaneri pillugit GA-mik oqaloqateqarnissaminnut piareersimapput. Taama oqaloqatigiinneq inuussutissarsiuteqartunik akileraarusiisarnernerup allanngortinneqarnissaa pillugu oqaloqatigiittarnissanut naleqqutsillugu atatinneqarsinnaavoq.

Piffissaliussanik sivitsuisarnermut immikkut akuersissuteqartarnerup allanngortinneqarnera, ukiumi aningaasarsiorfiusumi 2011-mit atulersinneqarnissaanik aalajangernermut Akileraartarnermut Aqatsisoqarfiup sulianik suliaqartarneranut innimiginninneq tunngaviuvoq. Aningaasarsianik angissusiliisarneq augustusip qaammataata naanerani naammassineqartussaammat ingerlatseqatigiiffiit nammineerlutik nalunaarsuutiniq tunniussinissamut killiliussamik sivitsuisarnissap kingunerissavaa, Akileraartarnermut Aqatsisoqarfiup pissusiusut malillugit ingerlatsiviit amerlanngitsuinnaat aningaasatigut isertitaasa angissusilernissaat naammassisinnaasassavai. Ingerlatseqatigiiffiit nammineerlutik nalunaarsuiffiisa tunniunneqarnissaannut killiliussaq sivitsorneqassappat tamaalilluni, Akileraartarnermut Aqatsisoqarfiup sullissinera eqqarsaatigalugu, pisariaqalissaaq ingerlatseqatigiiffiit aningaasatigut isertitaannik annertusiliinissap naammassineqarnissaanut killiliussamik kinguartitsinissaq. Taamaasilluni naatsorsuutigineqassaaq nunap karsia ernianik isertitassaagaluaniq annaasaqarnissaa. Annaasaq malittarisassanik atuuttunik sukaterinikkut matuneqarsinnaassaaq.

GA-p ilanngullugu oqaatigaa, tusarniaassutigalugit nassiunneqartuni uppernarsineqanngimmat nammineerluni nalunaarsuutit amerliartuinnartut kingusinnaarlugit tunniunneqartarneri pillugit oqaaseqaammut, aammalu tusarniaassutini takuneqarsinnaanani, misissorneqarsimanersoq, akileraarutis-sanut qaffaassutip qaffanneratigut naatsorsuutigineqarnersoq ilimagineqartutut kinguneqassanersoq.

Akileraartarnermut Aqatsisoqarfiup malugisimavaa ukiunut siuliinut sanilliullugu amerliartuinnartut missingersuussinikkut angissusilerneqartarmata, tamanna ima peqquteqarpoq, nammineerluni nalunaarsuutit siornatigornit amerlanerit kingusinaarlugit tunniunneqartarneri, tunniussinngitsoortoqartarlunilu. Aammattaaq Akileraartarnermut Aqatsisoqarfiup misilittagaraa, nammineerluni nalunaarsuinissamut pisussaaffeqartut ilisimaneqartut uteqqiasumik kingusinaartumik tunniussisartuusut. Tamatumunnga ilaatigut peqquteqarsinnaavoq, nammineerluni nalunaarsuinissamut pisussaaffeqartut ilanngaatinik annikinnerusumik isertitaqartut ullumikkut akileraarutissaat 100

*koruninik taamaallaat qaffaaffigineqarsinnaammata. Akileraartarnermut Aqutsisoqarfiulli allattu-
gaatiginngilaa nammineerluni nalunaarsuisusaatitaasut piffissaq eqqorlugu tunniussineq ajortut
amerlassusaat pillugu.*

GA-p naggasiullugu iluarisimaarpaa, aningaaseriviit maaniittut periarfissinneqarmata Akileraartar-
nermut Aqutsisoqarfik aqputigalugu nalunaaruteqalersinnaalernerat.

GrønlandsBANKEN

GrønlandsBANKEN-ip iluarisimaarpaa, kalaallit nunaanni aningaaseriviit Danmarkimi aningaase-
riviit assigalugit periarfissinneqarmata, nunagisami oqartussanut nalunaarusiorsinnaalerneq ameri-
kami oqartussanut toqqaannartumik nalunaarusiornermut taarsiullugu. GrønlandsBANKEN-ip
aammattaaq oqaatigaa, sapinngisamik pitsaanerpaamik naammassisaqarnissaq siunertaralugu sule-
qatigiinnissamut piareersimalluni, matumani atortorissaarutigut assigisaannillu ataqatigiissaarineq
atuinerlu pineqartillugit, malittarisassat nutaat kingunerisaannik piulersinnaasut pillugit.

KANUKOKA

KANUKOKA siunnersuummut oqaaseqaateqanngilaq.

Aalajangersakkanut ataasiakkaanut oqaaseqaatit

§ 1-imut

Nr. 1-imut

Imm. 1-mut.

Nammineerluni nalunaarsuiffiup kingusinaarluni nassiunneqarnerani procentiliilluni maannakkut 2 – aamma 5 procentimik qaffaasarneq allanngortillugu, nammineerluni nalunaarsuiffimmik nassius-sinissamut piffissaliussap ullormik ataatsimik qimmorneqarneri tamaasa qaffaassutissap aalajanger-simap 200 kr.-iunissaa, taamaattorli inunnut annerpaamik 2.000 kr.-iunissaa, aammalu namminer-sorlutik inuussutissarsiuutinik ingerlataqartunut aamma inatsisit naapertorlugit inuttut isigineqarsin-naasunut annerpaamik 5.000 kr.-iunissaa siunnersuutaavoq.

Nammineerluni nalunaarsuiffiup, nammineerluni nalunaarsuiffimmik nassius-sinissamut piffissalius-sap qaangiutinnginnerani tiguneqarsimannginnera Akileraartarnermut Aqutsisoqarfimmit paasine-qarpat akileraarutissanut qaffaassutissaq atuutilissaaq. Qaffaassutissamik, taamatullu aamma nam-mineerluni nalunaarsuinissamut piffissaliussamik qimmuinermik naatsorsuineq inatsimmi § 16, imm. 3-miit 4-mut tunngavigalugit pissaaq.

Assersuutigalugu nammineerluni nalunaarsuiffimmik nassius-sinissamut piffissaliussaq sisaman-ngornermi qaangiuppat, aqaguanilu ullaakkut 06.00 nammineerluni nalunaarsuiffik tunniunneqarluni, taava akileraarutissanut qaffaassutissamik akiliisoqassanngilaq. Aqaguanili allaffimmi sulinerup nalinginnaasumik allartereernerani nammineerluni nalunaarsuiffik tunniunneqarpat qaffaassutissaq 200 kr.-i akilerneqassaaq.

Assersuutigalugu nammineerluni nalunaarsuiffimmik nassius-sinissamut piffissaliussaq tassaappat tallimanngorneq 1. maj, nammineerlunilu nalunaarsuiffik sisamanngorneq 7. maj tunniunneqarluni, taava qaffaassutissat 5 x 200 kr.-it = 1000 kr.-it naatsorsorneqassappat. Arfininngorneq sapaallu ilanngunneqassappat.

Nammineerluni nalunaarsuiffik aamma ingerlatsiner-mut naatsorsuutit piffissaagallartillugu nassiu-neqanngippata, taava aalajangersagaq malillugu qaffaassutissaq ataasiinnaq akiligassiissutigineqas-saaq.

Nammineerluni nalunaarsuiffiup nassiunneqarnerata kingorna paasinarsip-pat nammineerluni nalunaarsuiffik piumasaqaataasunut naleqqiulluni ima amigaateqartigisoq, tak. § 17 aamma § 18, allaat nammineerluni nalunaarsuiffik nammineerluni nalunaarsuiffittut il.il. pissusissamisoor-tutut isigineqarsinnaanani, taava akileraarutissat qaffaassutissaat piffissamut pineqartumut tunngatillugu tamakkiisumik akiligassiissutigineqassappat. Pisuni taamaattuni qaffaassutissamik tamakkiisumk ilaannakuusumilluunniit akiliisinneqannginnissaq immikkut ittumik qinnutigineqarsinnaavoq, jf. § 19, imm. 2.

Inuup imaluunniit namminersorluni inuussutissarsiummik ingerlataqartup pineqarneranik aalaja-ngiinissami aallaavigineqassaaq suliffeqarfimmik ingerlatsineq nammineq akiliilluni akisussaaffi-galugulu aningaasarsiornermik ingerlatsinerunersoq, aammalu sinneqartooruteqarnissaq siunertarin-

eqarnerseq. Aamma namminersorluni inuussutissarsiummik ingerlataqartuusimanermi atuuppoq suliffeqarfiup ingerlaavartuunerusumik ingerlanneqarnissaa, imaanngitsoq piffissami sivikitsuaraarsuarmi, aammalu suliffeqarfiup mikisuaraarsuunnginnissaa.

Namminersorluni inuussutissarsiummik suliffeqarfiup pineqarneranik naliliinissami, akileraartusaatitaasup suliffeqarfiutimi saniatigut akissarsiortutut aningaasarsiaqarnera apeqqutaanngilaq.

Sulinikkut aningaasarsiat namminersorluni inuussutissarsiummik suliffeqarfiuteqarnikkut aningaasarsiatut isigineqanngillat. Akerlianik tassaapput inuup nammineq aningaasarsiai. Tamanna aamma pensionisianut, honorarisanut, erniatigut isertitanut il.il. atuuppoq.

Namminersorluni inuussutissarsiummik ingerlataqartup pineqarneranik naliliinissami imaattoqarnera pingaartinneqarsinnaavoq

- aningaasarsianik pissarsisup sulineq suliakkiisup suliqaqqusinermini iltersuineriunna-gaata saniatigut allamik akuliuffigineqarani aaqqissussavaa, aqussallugu, suliakkiutigissal-lugu nakkutigissallugulu,
- suliakkiisup aningaasarsianik pissarsisumut pisussaaffia suliqaqqusineranut ataasiak-kaanut killeqarpoq,
- aningaasarsianik pissarsisoq suliqaqqusineq pissutigalugu tassuma saniatigut allanik sullissisinaanermut killilersorneqanngilaq,
- aningaasarsianik pissarsisoq suliap sularineqarnissaani suliakkiisumut aningaasatigut akisussaavoq allatulluunniit nammineerluni aningaasatigut akisussaasuulluni,
- aningaasarsianik pissarsisoq atorfinitsissimasaminik sulisoqarpoq, ikiorteqarnissanilu nammineq aalajangersinnaallugu,
- akiliutissaq akiligassiisoqarneratigut akilerneqassaaq, aatsaallu suliassaq isumaqatigiissu-taasutuut naammassineqarpat amigaataajunnartullu aaqqiivigineqareerpata tamakkiisumik akilerneqassalluni,
- aningaasarsiat suliakkiisunit aalajangersimasuunngitsunit pissarsiarineqartarput,
- sinneqartoorutaajunnartut aningaasarsianut aalajangiisuupput,
- aningaasarsianik pissarsisup sulinermi atortut, maskiinat aamma sannatit assigisaalluunniit atorneqartut nammineq pigisarai,
- aningaasarsianik pissarsisup atortussat suliap sularineqarnerani atorneqartut tamakkiisu-mik ilaannakuusumilluunniit isumagisarai,
- aningaasarsianik pissarsisoq namminerisamik inini ingerlatsiveqarpoq, soorlu niuertarfik, sannavik, allaffik, sullissivik, titartaasarfik il.il., sulinerlu tassani tamakkiisumik ilaanna-kuusumilluunniit ingerlanneqartarpoq,
- aningaasarsianik pissarsisup inuussutissarsiummik ingerlatsinera immikkut akuerisaaner-mik, akuersissummik assigisaanilluunniit, aammalu aningaasarsianik pissarsisup akuersis-summik taamaattumik tigungmiaqarnissaanik piunasaqaateqarfiuvoq,
- aningaasarsianik pissarsisoq annoncetigut, allagartaliinermigut assigisaanilluunniit nalu-naarutiginninnermigut suliassamik ilisimaarinnittuunerminik suliassamillu erseqqinneru-sumik taasamik suliqaqarumanerminik nalunaaruteqarsimassaaq,

- aningaasarsianik pissarsisoq suliassap suliarineqarnerani ajoqusertoqarsinnaaneranut akissusaasuuvoq.

Imm. 2-mut

Imm. 1-mi allannguutit kingunerisaanik, siunnersuutigineqarpoq imm. 2-mi oqaatsit atorneqartut tamatuma malitsigisaanik allanngortinneqassasut.

Nr. 2-mut

Akileraaruserinermik ingerlatsineq pillugu inatsimmi § 35 a-mik nutaamik ilanngussisoqarnissaa siunnersuutaavoq. Paasissutissanik nalunaaruteqarnissaq pillugu, aamma Kalaallit Nunaata nunanik assigiinngitsunik akileraartarnermut paasissutissat pillugit akileraarutitigut isumaqatigiissutaasa taamaattut allat eqquutsikkumallugit kontut nalunaarutigineqartussaasut kikkunnit pigineqarneri paasiniarlugit qanoq periaaseqarnissaq pillugu Naalakkersuisut maleruagassiorsinnaanerit aalajangersakkap siunnersuutaasup periarfissiissutigaa.

Aamma siunnersuutip imarai aalajangersagaq nunatsinni aningaaseriviit Amerikamut akileraarutitut tunngatillugu unerartitsisussaaajumasut, FATCA-mik isumaqatigiissut naapertorlugu unerartitsisussaatitaanerminnik eqquutsitsinissaannik periarfissiisoq, aamma piginnaatitsissut nunatsinni aningaaseriviit imminnut taamatut pisussaaffilersimangitsut taamaaliornissamut taarsiullugu, akiliuteqarnissaq sioqqullugu suliaqartussanut paasissutissanik ingerlatitseqqittarnissaannik Naalakkersuisut maleruagassiornissaannut.

Kiisalu aalajangersakkap siunnersuutigineqartup imaraa aningaaserivimmi kontumik pilersitsisup kontoqartup inuillu nakkutilliisuujuunartut kikkunerannik aningaaserivimmut nalunaarutiginninnissaanik erseqqinnerusumik pisussaaffiliisoq.

Imm. 1-imut

Aningaaseriviit aningaaserivinni kontut pillugit paasissutissanik akileraaruseriffimmut ukiumoortumik nalunaaruteqartarnissaat pillugu maleruagassanik aalajangersaanissamut Naalakkersuisut periarfissinneqarnissaat siunnersuutaavoq. Akileraartarnermut oqartussaasut, Kalaallit Nunaata FATCA-mik isumaqatigiissut naapertorlugu pisussaaffimminik eqquutsitsinissaa pisinnaaqullugu aamalu paasissutissanik nalunaarutigineqartunik ingerlatitseqqissinnaajumallutik, nunatsinni aningaaseriviit paasissutissanik nalunaaruteqartussaataitanissaannik pisussaaffiliisinnaanissaat tassuunakkut qulakkeerneqassaaq.

Periarfissiineq aamma ima ilusiligaavoq Kalaallit Nunaata suleqatinut allanut USA-junngitsumut isumaqatigiissutigiunnagaanik eqquutsisinissaq pisinnaaqullugu nalunaaruteqartarneq pillugu maleruagassanik erseqqinnerusunik aalajangersaanissamut atorneqarsinnaalluni, kiisalu aamma kontut nunanut sumiiffinnulluunniit Kalaallit Nunaata isumaqatigiissuteqarfiginngisaanut attuumassutillit,

imaluunniit taamaallaat Kalaallit Nunaannut attuumassutillit pillugit taamatulli nalunaaruteqartar-nissaq pillugu maleruagassiornissamut atorneqarsinnaalluni.

Taaguutit "anigaaseriviit" aamma "anigaaserivinni kontut" FATCA-mik isumaqatigiisummi atorneqarnerattuut paasineqassapput. Taaguutit taakku suleqatinut allanut isumaqatigiissutaajunnar-tussani taamatulli imaqarnissaat naatsorsuutigineqarpoq.

Anigaaserivittut paasineqassaaq aqutsisoqarfik sulinermini annertunerpaamik allap akiligassaanic anigaasatigut pigisanik nalilinnik uninngatitaqartoq. Imaluunniit anigaasaliissutinik aqutsisoqar-fik anigaaserivittut sulinermut atatillugu anigaasaliissutinik tunngaveqarluni ingerlataqartoq. Ima-luunniit anigaasaliisartoq sullitaq sinnerlugu suliniutinik aalajangersimasunik suliaqartartoq. Ima-luunniit sillimmasiisarfik anigaasanngorlugit tunniussisartoq imaluunniit ukiunut arlalinnut naaffe-rartumik isumaqatigiissut malillugu akiliuteqartartoq imaluunniit akiliuteqarnissaminut pisussaaffi-lerneqarsimasoq sillimmasiisarnermut isumaqatigiissut malillugu.

Anigaaserivik kalaallinit pigineqarluni anigaaseriviusaaq Kalaallit Nunaanni najugaqarfeqaruni. Kalaallit anigaaseriviisa nunani allani immikkoortortaat siuliani isumasiuummut ilaatinneqanngil-lat. Akerlianilli anigaaseriviit nunanit allaneersut immikkoortortaat isumasiuummut ilaassapput Kalaallit Nunaanni inissisimagunik.

Anigaaserivinni kontot aallaavittut paasineqassapput kontotut anigaaserivinnit ingerlanneqartutut. Oqaatigineqassaaq nunanik allanik akileraartarneq pillugu isumaqatigiissutini paatsuugassaanngit-sumik isumasiuutit allanneqarsinnaasassammata.

Paasissutissat nalunaarutigineqartussatut erseqqinnerusumik maleruagassiuunneqartussat makkuu-nissaat siunnersuutaavoq:

Anigaaserivinni kontoqartut kinaanerinut paasissutissat – taavalu inatsisit malillugit inuttut isigi-neqartunut inummik ataatsimik inunnilluunniit arlaqartunik nakkutilliisoqartunut tunngatillugu – aamma taakku kinaanerinut paasissutissat. Aamma pineqartut nunanut/sumiiffimmut sumut ima-luunniit nunanut/sumiiffinnut sunut attuumassuteqarnerannik nalunaaruteqarnissaq pillugu male-ruagassiortoqarsinnaavoq. Tassa imaappoq nunat sumiiffiilluunniit, kontut kikkunnit pigineqarne-rannik peqqissaartumik periuseqarluni paasiniaanerit kingunerisaannik kontoqartup inuulluunniit nakkutilliisuusup pineqartup attuumassuteqarfisaaqatut paasineqartut.

Kinaanermut paasissutissat nalunaarutigineqartussatut maleruagassiuunneqarsinnaasut tassaapput ateq, najugaq, cpr-, cvr-, SE imaluunniit IIN-normu aamma kinaanermut paasissutissatut nunani allani normut pigineqarpata normut taakku. Piginnittui arlaqarpata piginnittut, piginnittullu inatsisit malillugit inuttut isigineqartuuppata inuit taakkunani nakkutilliisuujunnartut kikkunerinik paasis-sutissanik nalunaaruteqartussaaneq pillugu maleruagassiortoqarsinnaavoq.

Aalajangersagaq, kinaanermut paasissutissatut nunatsinni normunut tunngatillugu ima atuuttussatut takorloorneqarpoq nalunaarutigineqartussaaq tunngaviatigut tassaassalluni inuup normua (cpr-nor-

mu). Pineqartoq cpr-normoqarani cvr-normoqarpat taanna nalunaarutigineqassaaq. Pineqartoq cpr-imaluunniit cvr- imaluunniit SE – normoqanngippat IIN-normu nalunaarutigineqassaaq. Pineqartoq aamma taamaattumik peqanngippat ulloq inuup inuuia nalunaarutigineqassaaq.

Kontonormu, kontonormoqanngippalluunniit aningaaserivimmi kontup kimit pigineqarneranik paasissutissat taamaaqatai.

Aningaaseriviup nalunaaruteqartuusup aqqa kinaaneranillu paasissutissatut normut. Tassunga ilanngullugu maleruagassiuunneqarsinnaavoq tassani kinaanermut paasissutissatut normu nunani allani oqartussaasunit atuutilersinneqartoq aamma pineqartoq. Kinaanermut paasissutissatut nunatsinni normunut tunngatillugu pineqartoq tassaassaaq aningaaseriviup nalunaaruteqartussaasup cvr-, SE-imaluunniit IIN-normua.

Aningaaserivimmi kontumi uninngasuutit imaluunniit nalingat. Sillimmasiineramik isumaqatigiissutinut aningaasanngorlugit nalilinnut taarsigassarsinermilluunniit isumaqatigiissutinut tunngatillugu tassaasinnaavoq aningaasanngorlugu nalinga imaluunniit utertinneqarnerani nalinga.

Kontunut imaaliallaannaq tiguneqarsinnaanngitsunik imaqartunut tunngatillugu paasissutissanik qulaani taaneqartunik nalunaaruteqarnissaaq pillugu maleruagassat saniatigut, kontumi pigisat pilersitaannik erniat, iluanaarutisiat, aningaasarsiat allat aammalu tunisinikkut imaluunniit nalilinnik aningaasanngortitsinikkut iluanaarutit tamarmiusut, qaammatisiutit malillugit ukiup ingerlanerani kontumut akilerneqarsimasut ilanngunneqarsimasulluunniit nalunaarutigineqarnissaat pillugu maleruagassat aalajangersagaq siunnersuutaasoq naapertorlugu aalajangersarneqarsinnaassapput. Aalajangersagarli siunnersuutigineqartoq naapertorlugu aalajangersarneqarsinnaasut tassatuaapput tunisinerni, nunatsinni aningaaseriviup nalunaaruteqartuusup tunisinermut atatillugu kontoqartoq sinnerlugu isumaqatigiinniartuuffigisimasaani imaluunniit kontoqartumut allatut sinniisuuffigisimasaani iluanaarutit tamarmiusut nalunaarutigineqarnissaat pillugit maleruagassat. Aningaasarsiat assigiinngitsut sisamat taakku iluanni nalunaaruteqartussaannermi pineqarput aningaasartaat tamarmiusut, tassa imaanngitsoq kontut imaaliallaannaq tiguneqarsinnaanngitsut ataasiakkaat erniaat, iluanaarutisiartaat aningaasarsiartaalluunniit allat imaluunniit tunisinerit ataasiakkaat iluanaarutitaat tamarmiusut.

Aallaqqaatitut akiliutinut kontunut tunngatillugu, erniat kontumut akilerneqarsimasut ilanngunneqarsimasulluunniit nalunaarutigineqarnissaat pillugu maleruagassat aalajangersagaq siunnersuutigineqartoq naapertorlugu aalajangersarneqarsinnaassapput. Tamatumaniissaaq nalunaarutigineqartussaasut tassaapput aningaasartaat tamarmiusut.

Aningaaserivimmi kontunut, imaaliallaannaq tiguneqarsinnaanngitsutut kontuunatilluunniit aallaqqaasiutitut kontuunngitsunut tunngatillugu aningaasat tamarmiusut, aningaaseriviup nalunaaruteqartuusup qaammatisiutit malillugit ukiup akiliiffigisassaata pisassanngortitsiffissaataluunniit ingerlanerani kontumut tunngatillugu kontoqartumut akilerneqarsimasut pisassanngortinneqarsimasulluunniit nalunaarutigineqarnissaat pillugu maleruagassat aalajangersagaq siunnersuutigineqartoq naaper-

torlugu aalajangersarneqarsinnaassapput. Matumani pineqarsinnaapput aningaasat aningaasanngor-titsinikkut pissarsiarineqarsimajunnartut kontoqartumut akilerneqarsimasut tamarmiusut.

Aalajangersagaq siunnersuutigineqartoq naapertorlugu nalunaarutigineqartussatut maleruagassiuun-neqarsinnaasut tassaapput ukiumoortumik nalunaarutit. Tassa imaappoq aningaasarsiat assigiinngit-sut qulaani taaneqartut iluanni aningaasat, qaammatisiutit malillugit ukiup ingerlanerani iluanaaru-tigineqarsimasut tamarmiusut. Taamaattorli aningaaseriviup ingerlassimasaq nalunaaruteqartussaa-nermik nassataqartoq qaammatisiutit malillugit ukiup ilaannaani ingerlassimappagu, qaammatisiutit malillugit ukiup aallartinneraniit nalunaaruteqartussaanerup naanerata tungaanut imaluunniit nalu-naaruteqartussaanerup aallartinneraniit qaammatisiutit malillugit ukiup naanerata tungaanut piffissat ilaannakuusut pillugit nalunaaruteqarnissaq pillugu maleruagassat aalajangersarneqarsinnaassapput.

FATCA-mik isumaqatigiisummik atuutilersitsinissaq siunertaralugu, maleruagassat akileraartar-nermut oqartussaasut paasissutissanik USA-mut tunniunneqartussanik nalunaarutiginninnissaannik qulakkeerisussat aalajangersarneqarnissaat siunertaavoq. Periarfissiissutit qulaani nassuiaatigineqar-tut maleruagassanik taamaattunik suliaqarsinnaanissaq siunertaralugu suliaapput. Aamma nalunaa-ruteqarnissaq pillugu maleruagassat FATCA-mik isumaqatigiisummi allassimasut avaqunneqar-sinnaanissaat siunniunneqarpoq.

Imm. 2-mut

Aningaaseriviit, aningaaseriviit erseqqinnerusumik taaneqartut akiliuteqarfigisimasamik aqqinik na-lunaarutiginnittarnissaat pillugu Naalakkersuisut maleruagassiorsinnaanissaat siunnersuutaavoq. Aammattaaq akiliutit taamaattut aningaasartaasa tamarmiusut nalunaarutigineqarnissaat pillugu ma-leruagassiortoqarsinnaavoq.

Imm. 3-mut

Aningaaseriviit nalunaaruteqartussaatitaasut, aningaaserivinni kontut kimit pigineqarneri akiliutillu aammalu taakku nalunaarutigineqarneri pillugit nalunaaruteqarnerminni peqqissaartumik periuse-qarnissaat pillugu Naalakkersuisut maleruagassiorsinnaanissaat siunnersuutaavoq. Aammattaaq pe-riusinut taakkununga atatillugu nammineq nalunaajaateqartarnissaq pillugu maleruagassat Naa-lakkersuisunit aalajangersarneqarsinnaanissaat siunnersuutaavoq.

Imm. 4-mut

Nalunaaruteqarnissaq peqqissaartumillu periuseqarnissaq pillugit maleruagassanik Naalakkersuisut aalajangersaasinnaanannerannik imm. 1-imiit 3-mut piginnaatitsinissat siunnersuutigineqartut maleru-a-gassatut nalinginnaasutut ilusiligaapput, tassa soorlu USA-mi nunaniluunniit suleqatigisani allani Kalaallit Nunaata taamatut isumaqatigiisuteqarfigisaani aningaaserivinni kontunut taamaallaat atuuttussaatinnaq. Imm. 1-imiit 3-mut aalajangersakkatut siunnersuutit aammattaaq aningaaseri-vinni kontunut nunanut allanut attuumassuteqartuinnarnut atuuttussaannngillat. Tassa imaappoq ma-

leruagassat siunnersuutigineqartut periarfissiissapput kontut Kalaallit Nunaannuinaq attuumassuteqartut aammattaq nalunaarutigineqarnissaat pillugu maleruagassiorsinnaanissamut.

Taassuma kingunerisaanik siunnersuutigineqarpoq maleruagassanik erseqqinnerusunik ilusilersuinnermi makku allanngorartuusinnaassasut:

Siunnersuutaavoq maleruagassat imm. 1-imiit 3-mut naapertorlugit atuutilersinneqartut taamaallaat aningaaserivinni kontunut, inunnit aamma inatsisit naapertorlugit inuttut isigineqarsinnaasunit inunnik nakkutilliisoqartunit, nunanut sumiiffinnulluunniit marloriaammik akileraannginnissaq pillugu isumaqatigiissut, nunat tamat isumaqatigiissutaat alla naalagaaffiilluunniit isumaqatigiissutaat imaluunniit allaffeqarfitsigoortumik isumaqatigiissut naapertorlugu akileraarutitigut suliassani ikioqatigiittarnissamik isumaqatigiissuteqarfigineqarsimasunut, aningaaserivinni kontut pillugit paasissutis-sanik ingerlaannartumik paarlaasseqatissanut attuumassuteqartunut, imaluunniit nunanut sumiiffinnulluunniit, matumani aamma Kalaallit Nunaannut attuumassuteqarneq aalajangerneqarsinnaanngitsillugu atuuttuunissaat. Nalunaaruteqarnissap piffissaq ungasinnerusooq eqqarsaatigalugu aamma nunatsinni aningaaserivinni kontunut tamanut atuunnissaa naatsorsuutaavoq, maleruagassatulli siunnersuutaasup atuutsikkiartuaarneqarnissaa periarfissaavoq, tassa FATCA-mik isumaqatigiissut eqquutsinniarlugu maleruagassanik taamaallaat aallaqqaammut atuutilersitsinikkut, taavalu isumaqatigiissutit, Kalaallit Nunaata suleqatinut allanut USA-junngitsumut isumaqatigiissutigiunnagai tulluullugit.

Maleruagassat, maleruagassanit imm. 1-imi 2-milu allassimasunit piumasaqaatitakinnerusunik aalajangersaasinnaanissaq siunnersuutaavoq, maleruagassallu assigiinngitsunik ilusilerneqarsinnaapput, kontoqartup inuulluunniit nakkutilliisuusup nunamut sumiiffimmulluunniit sumut attuumassuteqarnera apeqqutaatillugu, matumani aamma sumut attuumassuteqarneq aalajangerneqarsinnaasimanngippat. Taanna maleruagassanik, maleruagassanit imm. 1-imi 2-milu siunnersuutigineqartunit piumasaqaatitakinnerusunik aalajangersaasinnaanermik periarfissiivoq, tamanna Kalaallit Nunaata nunat tamat tungaannut pisussaaffiliussimasaanut naapertuuppat. Assersuutigineqarsinnaavoq tamanna imm. 2-mi siunnersuutigineqartoq naapertorlugu maleruagassanik, taamaallaat aningaaserivinnut erseqqinnerusumik taaneqartunut, FATCA-mik isumaqatigiissummut atatillugu peqataanngitsutut isigineqartunut tunngatillugu atuuttussanik atuutilersitsinissamut periarfissiisoq. Taamatuttaaq aamma FATCA-mik isumaqatigiissut naapertorlugu peqqissaartumik periuseqarnissami pineqartut pineqanngitsullu allat aningaasartaannut killiliussassanik atuutilersitsinissamut periarfissiivoq. Kiisalu Kalaallit Nunaata suleqatinut allanut isumaqatigiissutigiunnagaani aningaasanut killiliussat pineqanngitsullu pillugit.

Nalunaaruteqartussaaitaanerup atuutsikkiartuaarneqarnissaa pillugu maleruagassanik aalajangersaasoqarsinnaanera siunnersuutaavoq. Atuutsitsiartuaarsinnaaneq FATCA-mik isumaqatigiissummi aamma Kalaallit Nunaata suleqatillu allat isumaqatigiissutigiunnagaanni allani pineqartoq pisinnaanngorlugu aalajangersagaq ilusiligaavoq.

Imm. 5-imut

UPA 2014/121

ANNN Suliassani nr.: 2013-091886

Imm. 5-itut siunnersuutigineqartup imarai maleruagassat nunatsinni aningaaseriviit, Amerikamut akileraarutissanik unerartitsinissaq imaluunniit aningaaserivimmuq peqataanngitsumut akiliuteqartoqassatillugu akiliuteqarnissat pitinnagit suliaqartussamut paasissutissanik ingerlatitseqqinnissaq pillugit maleruagassanik FATCA-mik isumaqatigiissummiittunik eqquutsitsinissaannik qulakkeerisusat.

Aalajangersagaq ima oqaasertaligaavoq, aningaaseriviit aningaaserivinnut allanut akiliuteqalernerminni nunanut allanut akileraarutininik unerartitsinnaasut, tamanna Kalaallit Nunaata aamma nunap sumiiffiulluunniit pineqartup isumaqatigiissutigisimasaat naapertorlugu pisussaaffinnik eqquutsitsiniarluni pippat. Aalajangersagaq nunatsinni aningaaseriviit USA-p tungaanut akunnermiliuttuunissamut piukkullutik (qualified intermediaries) sassarsimasut, tassungalu atatillugu unerartitsisussajumasut, aningaaserivinnut peqataanngitsunut akiliuteqarnerminni taakku akuersiseqqaanngikkaluarlugit akileraarutininik FATCA-mik isumaqatigiissut naapertorlugu unerartitsinnaanissaannik qulakkeerinnissamut pisariaqarpoq. Aalajangersakkatulli siunnersuut nalinginnaasumik ilusiligaavoq, tassa Kalaallit Nunaata suleqatinut allanut USA-junngitsumut taamatulli isumaqatigiissutigiuunnaani atorsinnaanngorlugu, taakku pisussaaffinnik taamaattunik imaqarpata.

Oqaatigineqassaaq akileraartarnermut oqartussaasut akileraarutit unerartinneqartut Amerikami akileraartarnermut oqartussaasut sinnerlugit tigussaneraat Kalaallit Nunaata USA-llu isumaqatigiissutiginnigimassuk. Taamaammat nunatsinni aningaaseriviit USA-p tungaanut akunnermiliuttuunissamut piukkullutik sassartussat sassarsimasulluunniit, tassungalu atatillugu unerartitsisussaatitaanermik pingaarnertut pisussaaffilersimasut akileraarutit unerartinneqartut, nunatsinni akileraartarnermut oqartussaasut akiliutitinnikkaluarlugit Amerikami akileraartarnermut oqartussaasunut toqqaannartumik akilertussaassavaat.

Aamma siunnersuutaavoq aningaaseriviit aningaasanik nunanut allanut akileraaruteqaataasussanik, aningaaserivinnut allanut akiliuteqartut imaluunniit taamatut akiliuteqarnermi akunnermiliuttuusut, akiliuteqarnissaq sioqqullugu suliaqartussanut paasissutissanik ingerlatitseqqittarnissaat pillugu maleruagassanik Naalakkersuisut aalajangersaasinnaanissaat. Paasissutissat ingerlateqqinneqarsinnaassat tassaassapput paasissutissat taamatut akiliuteqarnissami unerartitsinissamut nalunaaruteqarnissamullu pisariaqartut.

Maleruagassap taassuma qulakkiissavaa nunatsinni aningaaseriviit FATCA-mik isumaqatigiissummik eqquutsitsinnaanissaat anguniarlugu maleruagassiorsinnaaneq, kisiannili nalinginnaasumik oqaasertaqartillugu, taamaalilluni suleqatinut allanut USA-junngitsumut isumaqatigiissutaajunnartuni pisussaaffinnik taamaattunik atuutilersitsinissami, paasissutissanik tunniussinissaq pillugu maleruagassanik taamaattunik Naalakkersuisut aalajangersaasinnaanerannut tunngavissatut aamma atorsinnaanngorlugu.

Imm. 6-imut

Aningaaseriviup kontumik ammaaffigineqartup, aningaaserivimmi kontup ammarneqarneranut atattillugu kontoqartut inuillu nakkutilliisuujunnartut cpr-, cvr- imaluunniit IIN-normuinik aamma kinaanermut paasissutissatut nunani allani normui pigineqarpata normunik taakkuninnga, kiisalu paasissutissanik allanik kontoqartut inuillu nakkutilliisuujunnartut kinaaneriniik paasinninnissamut pisariaqartunik nalunaarfigineqarnissaa siunnersuutaavoq. Paasissutissanik taakkuninnga siunnersuut malillugu tunniussisussaataavoq aningaaserivimmi kontumik pilersitsisoq. Aamma paasissutissanik tunniussinissaq pillugu maleruagassat erseqqinnerusut Naalakkersuisunit aalajangersarneqarsinnaanissaat siunnersuutaavoq.

Aalajangersagaq inatsisissatut siunnersuummi § 2, imm. 3-imi siunnersuutigineqartutuut 1. juli 2014-imi atuutilissaaq.

Tassa imaappoq Kalaallit Nunaata FATCA-mik isumaqatigiissut naapertorlugu pisussaaffinnik eqquutsisisinnaanissaa maleruagassap siunnersuutigineqartup qulakkiissavaa. Maleruagassarli nalinginnaasumik ilusiligaavoq, tassa kontut nutaat pillugit kinaanermut paasissutissat nalunaarutigineqartussanngorlugit, kontoqartup inuilluunniit nakkutilliisuusut pineqartut nunanut/sumiiffimmut sumut imaluunniit nunanut/sumiiffimmut sunut attuumassuteqarnerat apeqquataatinnagu. Maleruagassaq aamma taamaalilluni Kalaallit Nunaata suleqatinut allanut USA-junngitsumut isumaqatigiissutigiunnagaani, aammalu aningaaserivinni kontut pillugit nalunaaruteqartarnermik aqqiissuussinermi nalinginnaasumi atorneqarsinnaassaaq.

Siunnersuutaavoq kinaassutsimut paasissutissanut tunniunneqartussanut aamma ilaassasoq cpr-, cvr- imaluunniit IIN-normu. Akileraartarnermut oqartussaasut tassuunakkut inuit selskabillu il.il. nalunaarutigineqartut kinaassusersisinnaassavaat. Aalajangersagaq imatut atortinneqassaaq, cpr-normu tunngaviatigut tassaassalluni nalunaarutigineqartussaq. Pineqartoq cpr-normoqarani cvr-normoqarpat taanna nalunaarutigineqassaaq. Pineqartoq cpr- imaluunniit cvr-normoqanngippat IIN-normu nalunaarutigineqassaaq. Pineqartoq aamma taamaattoqanngippat ulloq inuuk taarsiullugu nalunaarutigineqassaaq. Nunatsinni aningaaseriviit taamaalillutik cpr-, cvr- aamma IIN-normut kiisalu ullut inuuiit pineqartut pigeriissavaat, taakkumi nalunaaruteqartussaanerit allat eqquutsinniarlugit pissarsiariniarneqartareerput.

Kontunut kingusinnerpaamik ulloq 31. december 2013-imi pilersinneqartunut tunngatillugu isumaavoq piginnaatitsissut atorneqassasoq, aningaaseriviit kinaanermut paasissutissanik pineqartunik pissarsiniartussaanerannik atuutilersitsinissamut, tassa aningaaserivinni kontunut, kontut akiliutillu pillugit paasissutissanik peqqissaartumik suliaqarnissaq pillugu maleruagassat inatsisissatut siunnersuut naapertorlugu atuutilersinneqartussat naapertorlugit nalunaarutigineqartussaasutut paasineqartunut tunngatillugu.

Kontu, kontoqartup inuilluunniit nakkutilliisuusup nunani arlaqartuni akileraartarnikkut angerlarsimaffeqarnera imaluunniit USA-mi innuttaassuseqaatigaluni nunanut sumiiffinnulluunniit arlaqartunut akileraartarnikkut angerlarsimaffeqarnera pissutigalugu, nunanut sumiiffinnulluunniit arlaqartunut attuumassuteqartoq paasineqarpat, kinaanermut paasissutissatut normut nunanut sumiiffinnul-

luunniit pineqartut attuumassuteqarfigisaannut tamanut siunnersuut naapertorlugu pissarsiariniarneqartussaassapput, pineqartut nunani sumiiffinniluunniit taakkunani kinaanermut paasissutissatut normoqarpata. Aamma kontunut pioreersunut tunngatillugu, pineqartut nunani sumiiffinniluunniit attuumassuteqarfigisaanni tamani kinaanermut paasissutissatut normut piniarneqartarnissaat paasissutissiissutigineqartarnissaallu pillugit maleruagassat, kinaanermut paasissutissatut normut pillugit maleruagassani erseqqinnerusuni aalajangersarneqarumaarnissaat isumaavoq.

§ 2-mut

Imm. 1-imut

Inatsisartut inatsisaanni § 1, nr. 1-ip 1. januar 2015-imi atuutilernissaa siunnersuutaavoq.

Imm. 2-mut

2014-imut nammineerluni nalunaarsuiffiit 2015-imi nassiunneqartussat siunnersuummi pineqartunut ilaanissaat siunnersuutaavoq.

Imm. 3-mut

FATCA-mik isumaqatigiissutip eqquutsinneqarnissaa siunertaralugu siunnersuutaavoq siunnersuummi § 1, nr. 2-p 1. juli 2014-imi atuutilernissaa.